

chercher dans ces vastes forests dequoy subuenir à leur faim. A peine Barnabé auoit-il fait vn quart de lieüe, qu'il trouue à son rencontre vn ieune cerf, il le perce de ses flèches, il le despoüille sur la place, se charge de ce doux fardeau, retourne au lieu où estoit leur bagage, prepare le souper qui attend tous les autres absents. Sur le soir mes chasseurs arriuent plus affamez & moins chargez qu'ils n'estoient partis; le Chrestien les attend au chemin, & comme ils ne luy voyent que son carquois en main. Ton Dieu, luy disent-ils, a esté fourd pour cette fois à tes prieres, quelque autre iour que tu auras esté plus heureux, alors il t'aura entendu. Non non, dit-il, nous ne viuons qu'à ses despens, vostre impieté ne l'a pas empesché de nous faire du bien; mais vous meriteriez de mourir icy de famine; il vous traite comme vn bon pere fait de meschants enfans qu'il espere quelque iour deuoir se reconnoistre.